



CHRISTA JIENG BOUVA KISUONNA



“Ama leh athokit thahatna
kahet a athuohgimna chu
kathuohkhompi a,
athina bang a chu kathi
nuom ahin,
kajo pou le thina a kuon a
jong kathodoh ding ahi”

Philippi 3:10, 11





Philippi mite'n sochatna lampi itobang ahi phatah in aheta uve; Paul le Silas in hiche khopi dia tahsanna kisaan masa- suongkul ngahpa- kom anaseipihsa lhon bang chun (Acts 16:30-31).

Tun vang houbung akiphut det tai; ahin sochatna lampi lhokhielna thei tampi aum nalai e


Hiche tah jieh chun Paul in tahsanna khompi ho ahailou diuvn agahchah e.

➡ Sochatna lhasolouna dia thumop:

- ◆ Kidalsena ding ho (Philippi 3:1-3)**
- ◆ Dalhah ding ho (Philippi 3:4-6)**
- ◆ Poimo pen tah chu (Philippi 3:7-8)**

➡ Sochatna nei jing dia thumop:

- ◆ Christa tahsanna (Philippi 3:9)**
- ◆ Christa hetna (Philippi 3:10-16)**





SOCHATNA LHASOLOUNA DIA THUMOP


KIDALSENA DING HO

“Uichate chu kivet phat un, thilse bol ho chu kivet phat un lang cheptan lou khohsah ho chu kivet phat uvin.” (Philippi 3:2)

Tahsanna suhmangpih theiho ase i masang in Paul in thumop phabep ape’i: “*Pakai chung ah kipah jing un*” (Phil. 3:1a).

Hitin jong aseibe’i: “*Nangho dia aphatchuom jie h in kasutsa velsut kit ding kachim poi*” (Phil. 3:1b).

Pakai a iti ikipa thanop jing ding u ham?



Pathien lungsiet longlou chan (Psalm 31:7)

Ama a tahsanna ngaplhah (Psalm 5:11)

Sochatna ga phattheina chan (Psalm 9:14)

Pathien Dan nit (Psalm 119:14; Isaiah 58:13, 14)

Athu tahsan (Psalm 119:162)

Pathien tahsan chate puikhang (Prov. 23:24, 25)



Hiche pet dia houbung manthahna lhut thei melma lien pen thudol Paul in ase i e: chondan khaotah a jui dia seile mihil lhem ho (Phil. 3:2). Koudan 3 in aminphah e: uichate (Ps. 22:16; 2 Pet. 2:21-22); thilse bolho; chuleh cheptan lou khohsah ho.



DALHAH DING HO

"Niget ni a chep kitan, Israel chilhah, Benjamin phung, Hebrew chilhah Hebrew mi, Danthu dungjui a Pharisai kahin" (Philippi 3:5)

Jerusalem Khoppi a chun Judate chondan Gentile te chung a chesah tei ding gotlou ding ahi akiti uve (Acts 15:19-21). Hinlah, cheptan ding ngaisah mihil phabep Philippi ahung lut ta uve (Phil. 3:2-3).

Phaat chesa a Paul cheptan le Juda chondan jui bukim le gut tah ahi dan aseipih e (Phil. 3:4-6):



Niget ni a chep kitan, hou guttah insung a hung seilien ahi



Hebrew lah a jong Hebrew mi; Benjami phung mi ahi




Danthu jui bukim, Pharisai hougut tah ahi



Tompan jieh a houbung bolse a pang ahi



Danthu lamdol a nuolna bei ahi



Jesu ahet masang chun ahina kiletsahpi tah anahi. Tun vang Dan hethiem lou ahi ahin kihetdoh tai (Mt. 5:21-22).

Christa bouva sochatna aum ahin he tai (Phil. 3:7).

POIMO PEN TAH CHU

"Ahinla hitobang phatchuomna kanei hi aboncha Christa jal a pannabei thil a kagel ahitai." (Philippi 3:7)

Paul in ahinkho lui leh thah alepkah in ahi. Langkhat a chun hetna gilna anei ho, Gamaliel thalheng thei le akineppi tah ahina, Pharisai lah a jong boltheina sangpi nei ahina; aphatchuompi thei ngen ahi.

Alangkhat a chun Christa anei apat ahinko akoi in, aphatchuompi thei jouse eh bang in agel tai; ajieh chu Christa ngailutna tepi thei umlou amudoh tai (Phil. 3:7-8).



Van le lei thah a tuonsot hinna nei ding sang a lu jo chanvou ipi um in tem? Ahin vannuoi in hichu hetphah in anei poi.

Hilai a vannuoi in thupi tah agelho leh Vangam a thupi kiti ding ho kah a lhenkahna aum jing e; Christa bang chonchan leh lhagao sochatna chu vannuoi thilho toh lepkah in aum jing e.



SOCHATNA NEI JING DIA
THUMOP

CHRISTA TAHSANNA


“Ama sunggil a keima ka kimudoh a, thiemchanna chu Danthu vang a kanei hilouva, tahsan jal a Pathien a hung kuon thiemchanna... Christa tahsan vang a kanei thei a” (Philippi 3:9)

Paul chondih tah a kigel pum in Damascus lampi achephei e; tahsan dihlou jop ho “*Lampi*” dih a lepui lut ding ati ahi (Acts 9:1-2). Ahin Damascus alut lut chun chondihna thahat jo, “*Christa tahsan vang a kinei thei*” chondihna, chun aluonkhum tan ahi” (Philippi 3:9).

Hiche nikho a pat ama chondihna a kisonna him him anei tapon ahi. Eima tohdoh jal a sochatna kineppi thei ahi poi ti ahin hechien tai (Gal. 2:16).

“(Christa) a thiemchanna anei ding” akilhen joh tai (Phil. 3:9). Ipi jieh hin tem?

1 Corinth 1:30 chun “Christa a um chu” sochatna thu, lhagao mitvah kipatna (*chihna*), tahsan vang a thiemchanna (*chondihna*), van thahat sopthieng sah dia kigotna (*thienthoua*), Christa hung kit nikho a loupi channa (*huhhingna*), abon a, anei suoh ding ahi tai ati.



CHRISTA HETNA

“Ama le athokit thahatna kahet a, athuohgimna chu kathuohkhompi a, athina bang a chu kathi nuom ahin” (Philippi 3:10).

Christa hetna iti inei thei diu ham (Phil. 3:10-16)?



Athu ikhuol tieng u leh

Lhagao Thieng ikipuisah tieng u leh

Athuohgimna ithuohpi tieng u leh

Malam bidoi hatah a idel tieng u leh



Christian hinkho hi guolsieh hai kitet tobang ahi. Malam bidoi kichieh tah a ikihet masah u ngai ahi. Hiche leisiet hinkho a umden le nopsah den ding igel u ahi poi. Christa thokitna ichan diu kinem joh ihi uve (Phil. 3:11).

Hiche nikho lhun kahse a “*Christa’n keima ei matkhah bang a keiman jong matkhah katup ahi*” iti thei ding u ahi jo’i (Phil. 3:12). Jesu’n kei din khopi hoi tah, kipa man, Ama toh tuonsot a lhatkhom ding ei koipih tai (Heb. 11:10; Phil. 3:14; 1Thess. 4:17).



“Hahsatna le buoina meipi sa tah in jiing hen lang hijong leh Paul in malam bidoi adel jing bang a tahsan chate jouse’n jong Pathien kinbol ding a ikilhanthieng ding u ahi.

Huhhingpu kuon a kaimang ding tupna’n vannuoi thil dei um tah tah hon hin nailut inte, ahin ama chun abidoi atoudel jing ding, vannuoi mite leh vantilte masang a Pathien mel mu ding chu thuohgimna jouse leh kihambolna jouse gei a imalou bang a asim ahi ti aphuondoh joh ding ahi. Ajieh chu hiche kinepna kipaman chan ding chu gimbolna jouse kalpeh a akoi ahi tai.

Christa seijui lah a nuoinung pen jong vanmun nop tah a chu lha ding ahin, chultih neilou Pathien gou lo ding a guotsa ahi tai.”